

Na osnovu člana 16. stav 1. Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona" broj 7/10) i članova 20. stav (2)., 21. i 22. Zakona o dopunskim pravima branilaca i članova njihovih porodica ("Službene novine Zeničko-dobojskog kantona" broj 1/14), na prijedlog Ministarstva za boračka pitanja, Vlada Zeničko-dobojskog kantona, na 172. sjednici održanoj dana 10.07.2014. godine, d o n o s i

## **U R E D B U**

### **O PREDNOSTI U ŠKOLOVANJU BRANILACA I ČLANOVA NJIHOVIH PORODICA**

#### **DIO PRVI - OPĆE ODREDBE**

##### **Član 1.**

##### **(Predmet Uredbe)**

Ovom Uredbom utvrđuju se uvjeti, način i postupak ostvarivanja prava na prednost u redovnom školovanju branilaca i članova njihovih porodica koji imaju prebivalište na području Zeničko-dobojskog kantona (u daljnjem tekstu: Kanton), kao i povratnika u Republiku Srpsku koji ostvaruju osnovna prava iz branilačko-invalidske zaštite u općinama Kantona i koji su na evidenciji nadležnog organa za vojne evidencije u općinama Kantona.

##### **Član 2.**

##### **(Prava)**

Prednost u školovanju branilaca i članova njihovih porodica, u skladu sa ovom Uredbom, obuhvata sljedeća prava:

- a) Prednost pri upisu u obrazovne ustanove i smještaju u đački i studentski dom;
- b) Besplatan upis u novu školsku/studijsku godinu;
- c) Besplatni obavezni udžbenici.

##### **Član 3.**

##### **(Pojmovi i definicije)**

- (1) Pojmovi korišteni u Uredbi: dobitnik ratnog priznanja ili odlikovanja, ratni vojni invalid, demobilizirani branilac, član porodice šehida, poginulog, umrlog, nestalog branioca i umrlog ratnog vojnog invalida i član uže porodice poginulog, umrlog ili nestalog dobitnika ratnog priznanja ili odlikovanja, upotrijebljeni su u skladu sa odredbama Zakona o pravima branilaca i članova njihovih porodica ("Službene novine Federacije Bosne i Hercegovine" broj 33/04, 56/05, 70/07 i 9/10) i Zakona o posebnim pravima dobitnika ratnih priznanja i odlikovanja i članova njihovih porodica ("Službene novine Federacije BiH" broj 70/05, 61/06 i 9/10).
- (2) Djetetom dobitnika ratnog priznanja ili odlikovanja/ratnog vojnog invalida/demobiliziranog branioca, u smislu ove Uredbe, smatra se dijete rođeno u braku/van braka, usvojeno dijete, kao i pastorče koje je sa istim živjelo u zajedničkom domaćinstvu najmanje posljednju godinu dana.

##### **Član 4.**

##### **(Dokazivanje statusa)**

U postupku ostvarivanja prava po ovoj Uredbi, branioci i članovi njihovih porodica svoj status dokazuju rješenjem nadležnog organa o priznavanju prava na ličnu i porodičnu invalidninu za ratnog vojnog invalida odnosno člana porodice šehida, poginulog, umrlog, nestalog branioca ili umrlog ratnog vojnog invalida; o priznavanju prava na mjesečni novčani dodatak za dobitnike ratnih priznanja i odlikovanja i članove uže porodice poginulog, umrlog ili nestalog dobitnika ratnog priznanja ili odlikovanja; uvjerenjem nadležnog organa o periodu učešća u Oružanim snagama za

demobiliziranog branioca, te na osnovu smrtnog lista i uvjerenja o učešću u Oružanim snagama umrlog demobiliziranog branioca, izdatog u skladu sa Zakonom o upravnom postupku ("Službene novine FBiH" broj 2/98 i 48/99).

## **DIO DRUGI - PRAVA**

### **POGLAVLJE I. UPIS U OBRAZOVNE USTANOVE I SMJEŠTAJ**

#### **Član 5.**

##### **(Prednost pri upisu u obrazovne ustanove i smještaju u đački i studentski dom)**

- (1) Ratni vojni invalid, demobilizirani branilac, dijete šehida, poginulog, umrlog, nestalog branioca, dijete ratnog vojnog invalida i dijete demobiliziranog branioca, ima pravo prvenstva pri upisu na redovno školovanje i studij u obrazovnu ustanovu čiji je osnivač Kanton ili općina, odnosno smještaju u đački i studentski dom na području Kantona.
- (2) U realizaciji prava iz stava (1) ovog člana, prednost u okviru branilačke kategorije kojoj pripada ima dobitnik ratnog priznanja ili odlikovanja, odnosno član porodice poginulog, umrlog, nestalog branioca - dobitnika ratnog priznanja ili odlikovanja.

#### **Član 6.**

##### **(Besplatan upis u novu školsku/studijsku godinu)**

Dobitnik ratnog priznanja ili odlikovanja, ratni vojni invalid, demobilizirani branilac, dijete šehida, poginulog, umrlog, nestalog branioca, dijete poginulog, umrlog, nestalog dobitnika ratnog priznanja ili odlikovanja, dijete ratnog vojnog invalida i dijete demobiliziranog branioca, ima pravo na besplatan upis na redovno školovanje i studij u novu školsku/studijsku godinu u srednjoškolskoj i visokoškolskoj ustanovi čiji je osnivač Kanton ili općina.

#### **Član 7.**

##### **(Izuzete od prava)**

Pravo iz člana 5. koje se odnosi na smještaj u đački i studentski dom i pravo iz člana 6. ove Uredbe, ne može ostvariti lice čiji ukupan prihod domaćinstva prelazi iznos prosječne neto plaće isplaćene u Federaciji BiH u prethodnoj godini prema podacima Federalnog zavoda za statistiku.

#### **Član 8.**

##### **(Način ostvarivanja prava)**

Obrazovne ustanove sa područja Kantona dužne su u svojim aktima kojim propisuju uvjete za upis redovnih učenika i studenata osigurati realizaciju prednosti branilaca i članova njihovih porodica iz članova 5. i 6 ove Uredbe, u roku od 30 dana od dana stupanja iste na snagu, o čemu izvještaj dostavljaju Vladi Kantona.

### **POGLAVLJE II. BESPLATNI UDŽBENICI**

#### **Odjeljak A. Uvjeti za ostvarivanje prava**

#### **Član 9.**

##### **(Novčana pomoć za nabavku udžbenika)**

- (1) Pravo na besplatne obavezne udžbenike za potrebe redovnog obrazovanja u osnovnim i srednjim školama na području Kantona, u skladu sa ovom Uredbom, mogu ostvariti djeca branilaca koji imaju prebivalište ili boravište na području Kantona u trajanju od najmanje 24 mjeseca, odnosno 6 mjeseci ukoliko imaju status povratnika i koji prava iz oblasti branilačko-invalidske zaštite ostvaruju u općinama Kantona, kao i povratnika u Republiku Srpsku, pod uvjetima iz člana 1. ove Uredbe.

(2) Pravo iz stava (1) ovog člana ostvaruje se kroz novčanu pomoć u visini:

- a) 100, 00 KM – za udžbenike osnovne škole;
- b) 150,00 KM – za udžbenike srednje škole.

#### Član 10.

##### **(Korisnici prava)**

Pravo na novčanu pomoć za nabavku udžbenika mogu ostvariti:

- a) djeca dobitnika ratnog priznanja ili odlikovanja;
- b) djeca umrlih ratnih vojnih invalida;
- c) djeca umrlih demobiliziranih branilaca – učesnika rata;
- d) djeca ratnih vojnih invalida – učesnika rata;
- e) djeca demobiliziranih branilaca koji su u redovima Oružanih snaga proveli najmanje 24 mjeseca u periodu od 06.04.1992.godine do 23.12.1995.godine ili 12 mjeseci ako su u Oružane snage stupili kao maloljetna lica.

#### Član 11.

##### **(Izuzeće)**

Pravo iz člana 9. ove Uredbe ne mogu ostvariti lica:

- a) koja obnavljaju istu godinu školovanja;
- b) čiji su članovi porodičnog domaćinstva vlasnici ili suvlasnici subjekta koji obavlja privrednu ili drugu djelatnost, registriranog kao pravno ili fizičko lice;
- c) čija primanja po članu porodičnog domaćinstva prelaze iznos od 200,00 KM.

### **Odjeljak B. Način ostvarivanja prava**

#### Član 12.

##### **(Podnošenje zahtjeva)**

- (1) Pravo na novčanu pomoć u svrhu nabavke udžbenika može se ostvariti podnošenjem zahtjeva općinskoj službi nadležnoj za poslove branilačko-invalidske zaštite u općini u kojoj podnosilac zahtjeva ima prebivalište, odnosno u kojoj ostvaruje prava iz branilačko-invalidske zaštite ili u kojoj se nalazi na evidenciji nadležnog organa za vojne poslove (u daljnjem tekstu: općinska služba).
- (2) Zahtjev iz stava (1) ovog člana za djecu branilaca podnosi roditelj/staratelj, na posebnom obrascu kojeg propisuje ministar Ministarstva za boračka pitanja Zeničko-dobojskog kantona (u daljnjem tekstu: Ministarstvo) u roku od osam dana od dana stupanja na snagu ove Uredbe

#### Član 13.

##### **(Objavljivanje konkursa)**

- (1) Po dostavljenoj instrukciji Ministarstva u tom smislu, općinska služba isticanjem na oglasnoj ploči objavljuje konkurs za dodjelu pomoći, kojim obavještava branioce i članove njihovih porodica o mogućnosti podnošenja zahtjeva iz člana 12. ove Uredbe.
- (2) Tekst konkursa Ministarstvo obavezno objavljuje na web stranici Kantona i dostavlja kantonalnim udruženjima branilaca i članova njihovih porodica.
- (3) Obavještenje o raspisanom konkursu općinska služba vrši i putem elektronskih i drugih medija sa područja općine.

Član 14.  
**(Sadržina konkursa)**

Konkurs za dodjelu novčane pomoći sadrži podatke o:

- a) iznosu jednokratne pomoći;
- b) licima koja imaju pravo učešća na konkursu;
- c) kandidatima čije prijave neće biti uzete u razmatranje;
- d) kriterijima na osnovu kojih se vrši izbor kandidata;
- e) dokazima koje kandidati prilažu uz prijavu na konkurs;
- f) roku za prijavu na konkurs i organu kojem se ista podnosi.

Član 15.  
**(Potrebna dokumentacija)**

Uz prijavu na konkurs kandidati prilažu sljedeću dokumentaciju:

- a) ovjerena kopija đlačke knjiŹice, odnosno svjedočanstvo iz prethodne godine;
- b) ovjerena kućna lista;
- c) uvjerenja o prihodima članova domaćinstva;
- d) ovjerena kopija lične karte;
- e) potvrda o statusu pripadnika branilačke populacije iz člana 3. Uredbe.

Član 16.  
**(Izbor kandidata)**

- (1) Općinska služba je duŹna sačiniti listu prvenstva, bodovanjem kandidata uz primjenu slijedećih kriterija:
  - a) ostvaren uspjeh u prethodnoj školskoj godini;
  - b) socijalno-ekonomska situacija;
  - c) učešće u OruŹanim snagama.
- (2) Odredbe stava (1) ovog člana ne primjenjuju se na djecu poginulih, umrlih, nestalih dobitnika ratnog priznanja ili odlikovanja; djecu umrlih ratnih vojnih invalida i djecu umrlih demobiliziranih branilaca, koji imaju prednost bez bodovanja kod dodjele novčane pomoći .

**Odjeljak C. Kriteriji za izbor kandidata**

Član 17.  
**(Uspjeh u prethodnoj školskoj godini)**

Po osnovu ostvarenog uspjeha u prethodnoj školskoj godini, kandidatima pripadaju bodovi:

- |                                 |                                |      |
|---------------------------------|--------------------------------|------|
| a) izvrstan                     | (prosjeak ocjena 5)            | 20 ; |
| b) odličan                      | (prosjeak ocjena iznad 4.5)    | 15;  |
| c) vrlo dobar                   | (prosjeak ocjena od 3.5 – 4.5) | 10;  |
| d) dobar                        | (prosjeak ocjena od 2,5 – 3.5) | 5;   |
| e) dovoljan                     | (prosjeak ocjena do 2,5)       | 1;   |
| f) ućenici koji se ne ocjenjuju |                                | 10.  |

Član 18.  
**(Socijalno-ekonomska situacija)**

- (1) Po osnovu prihoda po članu domaćinstva kandidatima pripadaju bodovi:
  - a) bez prihoda 25;
  - b) do 25 KM 20;

- c) od 26 – 50 KM            15;
  - d) od 51 – 100 KM        10.
  - e) od 101 – 150 KM        5.
- (2) Prihod u smislu ovog člana čine primanja koje članovi domaćinstva ostvaruju po osnovu plaća i drugih primanja iz radnog odnosa, starosne, invalidske i porodične penzije, privredne, uslužne i druge djelatnosti i dopunskog rada.
  - (3) Prihodom se ne smatraju novčana primanja po osnovu branilačko-invalidske i socijalne zaštite, dodatak na djecu, stipendije i krediti učenika i studenata.
  - (4) Dokazi o prihodima u smislu ove Uredbe su: uvjerenje pravnog lica o plaći zaposlenika, penzijski ček, izjava kandidata o prihodima svih članova sa kućne liste.

#### Član 19.

##### **(Ratni staž i stepen invaliditeta roditelja)**

- (1) Za svaki puni mjesec ratnog staža jednog roditelja, kandidatu pripada po jedan bod.
- (2) Kandidatima - djeci ratnih vojnih invalida, pripadaju bodovi po osnovu stepena invaliditeta roditelja:
  - a) I grupa                    20;
  - b) II grupa                   18;
  - c) III grupa                 16;
  - d) IV grupa                 14;
  - e) V grupa                    12;
  - f) VI grupa                  10;
  - g) VII grupa                 8;
  - h) VIII grupa                6;
  - i) IX grupa                  4;
  - j) X grupa                    2.

#### **Odjeljak D. Donošenje odluke o izboru**

#### Član 20.

##### **(Komisija)**

- (1) Općinska služba rješenjem formira tročlanu komisiju (u daljnjem tekstu: Komisija) koja vrši bodovanje prijavljenih kandidata i izradu preliminarne liste.
- (2) Preliminarnu listu općinska služba ističe na oglasnoj ploči, te dostavlja općinskim udruženjima branilaca i članova njihovih porodica.

#### Član 21.

##### **(Zahtjev za preispitivanje liste)**

- (1) Nezadovoljni kandidati imaju pravo podnošenja zahtjeva za preispitivanje preliminarne liste, koji mora bit obrazložen i utemeljen na dokazima koji potvrđuju tačnost iznesenih navoda.
- (2) Zahtjev iz stava (1) ovog člana podnosi se općinskoj službi najkasnije u roku od osam dana od dana isticanja liste.

#### Član 22.

##### **(Konačna lista)**

- (1) Nakon razmatranja podnesenih zahtjeva za preispitivanje liste i dostavljanja odgovora podnosiocima istih, Komisija sačinjava konačnu listu prvenstva kandidata za dodjelu novčane

pomoći, pri čemu je broj kandidata kojima će novčana pomoć biti dodijeljena u zavisnosti od visine utvrđenih budžetskih sredstava opredijeljenih za tu općinu.

- (2) Općinska služba dostavlja konačnu listu Ministarstvu.

#### Član 23.

##### **(Odobrovanje sredstava)**

- (1) Na osnovu evidencije o procentualnom učešću pripadnika branilačke populacije po općinama u odnosu na njihov ukupan broj u Kantonu i u skladu sa programom utroška sredstava za tekuću budžetsku godinu, Ministarstvo vrši raspodjelu sredstava na općine Kantona.
- (2) U slučajevima većeg planiranog iznosa sredstava za određene općine od broja kandidata koji ispunjavaju uvjete za dodjelu pomoći, ministar Ministarstva može izvršiti preraspodjelu istih sredstava na ostale općine.
- (3) Na osnovu dostavljene konačne liste i u skladu sa odredbama stava (1) i (2) ovog člana, ministar Ministarstva donosi odluku o izboru kandidata za dodjelu novčane pomoći, koju u narednom roku od tri dana Ministarstvo dostavlja općinskim službama.
- (4) Po prijemu odluke iz stava (3) ovog člana, općinske službe su obavezne dostaviti pismenu obavijest kandidatima koji nisu ostvarili pravo na dodjelu sredstava za kupovinu udžbenika.

#### Član 24.

##### **(Posebni slučajevi izbora kandidata)**

U slučajevima izuzetno teške socijalno-ekonomske situacije, na posebno obrazloženi prijedlog općinske službe u tom smislu, ministar Ministarstva može odlučiti o dodjeli novčane pomoći kandidatu koji nije ostvario dovoljno bodova za izbor po konkursu.

#### Član 25.

##### **(Ograničenje u dodjeli pomoći)**

Novčana pomoć može biti dodijeljena samo jednom kandidatu iz jednog porodičnog domaćinstva, odnosno za dva kandidata u slučajevima iz člana 16. stav (2) ove Uredbe.

#### Član 26.

##### **(Dostava i pravdanje sredstava)**

- (1) O doznačenim sredstvima za isplatu novčane pomoći općinska služba obavještava korisnike putem medija i istim vrši isplatu putem tekućih računa.
- (2) Općinska služba je dužna Ministarstvu dostaviti pravdanje utrošenih sredstava, u roku od 15 dana po izvršenoj isplati.

### **DIO TREĆI - ZAVRŠNE ODREDBE**

#### Član 27.

##### **(Sredstva za ostvarivanje prava)**

Sredstva za realizaciju prava branilaca i članova njihovih porodica po ovoj Uredbi, osiguravaju se u Budžetu Kantona u skladu sa prilivom sredstava.

#### Član 28.

##### **(Evidencija)**

Elektronsku evidenciju o podnesenim zahtjevima i korisnicima prava po ovoj Uredbi vode općinske službe i Ministarstvo, po obrascima koje propisuje ministar Ministarstva u roku od osam dana od dana stupanja na snagu ove Uredbe.

Član 29.

**(Instrukcije i nadzor)**

- (1) U realizaciji ove Uredbe, ministar Ministarstva može donijeti odgovarajuće instrukcije.
- (2) Nadzor nad provođenjem ove Uredbe ima Ministarstvo.

Član 30.

**(Ravnopravnost spolova)**

Sve imenice koje se odnose na braniocce i članove njihovih porodica, upotrijebljene u ovoj Uredbi samo u muškom ili samo u ženskom rodu, odnose se na oba spola.

Član 31.

**(Stavljanje Uredbe van snage)**

Danom stupanja na snagu ove Uredbe prestaje važiti Uredba o prednosti u školovanju branilaca i članova njihovih porodica ("Službene novine Zeničko-dobojskog kantona" broj 12/07 i 6/13).

Član 32.

**(Stupanje na snagu i objavljivanje Uredbe)**

Uredba stupa na snagu danom donošenja, a ista će biti objavljena u "Službenim novinama Zeničko-dobojskog kantona".

Broj: 02-\_\_\_\_\_ /14.

Datum, 10.07.2014. godine

Zenica

**PREMIJER**

*Munib Husejnagić, dipl.ing.maš.*

DOSTAVLJENO:

1x Ministarstvo za boračka pitanja,

1x Ministarstvo finansija,

1x Službene novine Zeničko-dobojskog kantona,

1x a/a.